

Abraun nia fiar

Lectio



“Na’i dehan ba Abraun: «Sai husi ó-nia rain, husi ó-nia moris-fatin no husi ó-nia aman nia uma, hodi bá iha rai ne’ebé ha’u sei hatudu. Ha’u sei halo ó sai povu boot ida no haraik bensen ba ó, halo ó-nia naran sai boot no ó sei sai bensen ida; Ha’u sei fó bensen ba sira ne’ebé fó bensen ba ó no sira ne’ebé fó malisan ba ó Ha’u sei fó malisan ba sira no iha ó família hotu rai nian sei hetan rahun-di’ak». Nune’e Abraun bá, hanesan Na’i haruka nia” (Gen 12, 1-4).

Pasajen narra istória bolun ida-nian ho resposta ida: istória ita-nia fiar nian, ne’ebé iha inísiu ho Abraun aman fiar-na’in sira-nian, hetan iha redasaun Jahwista no konstitui preparasaun ba Abraun nia emprendimentu no patriarka hotu nian.

Maromak manifesta an, dehan: «iha ó ema sei hateten rahun-di’ak ba família hotu rai nian» (v. 3c); liafuan sira-ne’e atu tutan ho istória orijen nian (Gen 2-11), istória ida ne’ebé iha inísiu ho Adaun (= mai husi rai, ebraiku Adamah = rai, tradús nu’udar naran próprio ema nain Adaun) no ninia dezobediénsia sai fonte ba malisan (= haktuir dala 5 iha Gen 3,14.17; 4,11; 5,29; 9,25). Abraun nia istória loke ho obediénsia nakonu ho bensen no iha pasajen hato’o ba dala lima.

«Sai husi ó-nia rain, husi ó-nia moris-fatin no husi ó-nia aman nia uma, hodi bá...». Maromak ko’alia. Ba Abraun ne’e maka faktu ida nunka rona basá to’o momentu ne’ebá nia maka nafatin ko’alia ba Maromak no la’ós nia kontráriu, maibé buat ne’ebé doko liu Abraun maka oras ne’e Maromak la apresenta an nu’udar perfeisaun, maibé nu’udar id ane’ebé hakruuk ba ema, hodi hahú relasaun ida komuñaun no diálogu nian ho nia. Iha relasaun ho Maromak, Abraun deskobre “buat ruma liután” no hakohak ninia konvite atu bá, atu husik buat hotu.

Abraun bá hodi husik buat ne’e sai ema ninia hun ka orijen, tesi kotu ai-hun vitál nia rain nian; nia povu nian, ninia grupu hodi heba’i seguransa hotu ne’ebé nia bele hetan husi sira no hakohak no simu “buat ruma liután” katak Maromak ne’ebé hadomi nia no akompañia nia iha momentu hotu. Iha ninia simun ne’e, Abraun see tilun ba Maromak ho konfiansa no obediénsia hanesan nia hao tuir hela liafuan sira salmista nian: «Rona, oan-feto, hateke no see tilun haluha ó-nia ema no ó-nia aman nia uma» (Sal 45,11). Ne’e maka liafuan sira knananuk-na’in dirije ba ninia noiva no refere ba ba Abraun nia vokasaun ne’ebé tenke sai husi nia rain, husi nia emar sira, husi nia moris-fatin, destinu ida liga ho iurai no nia povu nian no iha destinu ne’e mak Abraun hetan bensen boot ida. Liafuan sira salmu nian: Rona, hateke no see tilun, sai ba Abraun atitude fundamentál sira ne’ebé ita ida-idak tenke asume iha ita-nia relasaun ho Maromak nia Liafuan.

«Nune’e Abraun bá». Relasaun ho Maromak husu mós resposta ida. Abraun hodi hatán nia obedese ba Maromak nia Liafuan. Obedese fó hanoin nia abut iha lia-latin *ob-audire* no signifika raronak ho konsentimentu, raronak ida ne’ebé adere ho “sin” rasik ba buat ne’ebé rona.

Abraun, defaktu, sai husi nia rain ho Maromak nia Liafuan nu'udar gia, ne'ebé promete atu fó ba nia naran ida no povu boot ida no ida-ne'e tanba «Liurai Mesias laran-monu ba ó-nia fafurak» salmista kontinua ho nia knananuk.

Iha bolun ne'ebé Maromak halo ba Abraun, iha bolun ba ita ida-idak soi fafurak ida hetan iha obediénsia no iha konfiansa, finaidade rua ne'ebé haluan ita-nia orizonte iha ne'ebé Maromak mak buat hotu nia rohan.

Abraun bá no orienta nia an ba grandeza ida, grandeza Maromak nian. La'ós atu tama iha utopia, maibé atu tama iha mistériu nia tatomak, hodi husik nia husar, nia seguransa hodi tama iha seguransa grasa nian.

Maibé tenke obedese kedan nune'e? Tanba sá la husu buat ida? Tanba sá la halo pergunta, la ezije esplikasaun? Tanba sá la tau kondisaun sira? "Ha'u tenke sai husi ha'u-nia rain", motivu sá loos? No hafoin, bá iha ne'ebé? "Bá iha rai deskoñesidu, «li'ur» husi ha'u-nia seguransa sira, «li'ur» husi ha'u-nia territóriu, tanba sá?

Abraun la husu lia-husun sira-ne'e no seluk, maibé obedese de'it, hatán ba Maromka ho "sin" ida, la iha hakaran atu hatene, tanba nia iha koñesimentu foun, novidade ne'e Maromak rasik maka hato'o, ko'alia ba nia no nia konfia iha Maromak.

Abraun nia hamriik hodi bá, konfiansa ne'ebé nia tau iha Maromak halo atu S. Paulo define nia «fiar-na'in hotu nia aman» (Rm 4,11ss). Ba ita nia maka ezemplu kontínuu ida basá konvida ita atu konfia iha Liafuan no entrega an ba Maromak nu'udar Ó ida ne'ebé la bosok ita, konfia nafatin iha buat hotu.

Maibé oinsá loos, obedese laho garantia? Iha Abraun nia abandonu, iha haraik an ida, lakon an rasik ne'ebé lori ba fatin aas no sai riku: « Ha'u sei halo ó sai povu boot ida no haraik bengan ba ó, halo ó-nia naran sai boot no ó sei sai bengan». Abraun deskobre nia sai ruku ho rikusoin ne'ebé ka konsiste iha soi murak-mean sira ba an rasik, maibé atu hariku ema seluk. Defaktu, Maromak hatutan: «iha ó família hotu rai nian sei hetan rahun-di'ak». Ita haree iha ne'e Abraun halo tuir Jezús nia Luafuan ne'ebé dehan: « Imi keta haloot hamutuk murak iha rai, ne'ebé meak ho ular han mohu no na'okten sira sobu lutu hodi na'ok. Maibé imi halibur murak iha lalehan, iha ne'ebé ular no meak la hamohu sira, na'okten sira mós la sobu lutu hodi na'ok. iha fatin ne'ebé ó tau ó-nia murak, ó-nia fuan sei hela mós iha ne'ebá» (Mt 6,19-21).

Ne'e maka promesa ida ksolok nian ne'ebé ita hetan iha bengan, ksolok ida ne'ebé haraik ba família hotu rai nian. Bengan nia finalidade, Abraun nia bolun nia finalidade la'ós osan, maibé ba ksolok.

Ksolok ne'ebé Abraun hanorin oinseluk liu, la manán ksolok ida-ne'e hodi tau matan ba an rasik maibé hodi tau matan ba ema seluk no katak rikusoin la'ós hakonu kofre rasik, la'ós iha hakrak sasán sira ba an rasik, maibé atu fó.